

## HEBREO RUNACUNAPAG ISQUIRBISHA CARTA

Naupataga shumag tantianaypag uchuclata niyushay imanir Israel casta runacunapag cay carta isquirbisha cangantas.

Cay cartataga isquirbirayan maygansi Israel casta runam, Israel castancunapag. Nātan mana musyanchichu cay cartachru mana jutinta nimasham. Chaymi waquin runaga “Pablom isquirbira” nipācun. Cay cartata rurag runaga cay cartata isquirbira chay castancunapita alisca laquisha carmi.

Chaypin wichan achcam Israel castacuna Jesusman yupachicuyta galayusha capācura. Jinarcurmi chay yupachicurcanganpita alisca cunchuchisha capācura. Chaymi chay yupachicugcunapita waquinga pinsiarārira Moisés yachrachingancunalaman naupatanuysi yupachicuyta, nātan Jesús yachrachingancuna dējaruyta. Chaynuy pinsiarārira chay lutan runacunapita mana chaynuy cunchuchishala capācunan raygom. Chaymi cay cartataga isquirbira cay nishata: Moisés yachrachingannuy cawayga nāmi ushacasha. Nātan ushacashaga cayan Moisés isquirbinganta Jesús lapanta rurasha captinmi. Payga quiquinmi wanusha juchanchicunapita. Chaura paymi cayan cananga Tayta Dioswan amistächimaginchi. Chaymi Tayta Dios cananga munayan Jesús yachrachingannuyla cawananchita, Dios-mayin Jesús yachrachimasha casha. Cananga Jesús cayan sacerdotinchim Tayta Dioscagchru. Chaura Jesús yachrachingannuy cawayta dējarārirga manam jucnuypaga gueshpita atipapācunquichu Dios mas guepamam alisca cunchuchinanpitaga. Chaura ama juctaga imatas rurapācuychu nir isquirbishata.

Chaura cay carta isquirbiyta galayura cay nirmi:

---

### Diosga unaypitam tucuyaypa rimapamasha canchi

**1** <sup>1</sup>Diosninchiga quiquinpita unay wichan awillunchicunata achca cutim, jinaman tucuyaypam willachira unay willacugnincunawan. <sup>2</sup>Nātan cay ushanan junagcunaga Dios-mayin Jesucristowanmi willachimaranchi. Pay Jesucristowanmi Diosga rurara jana pachatas cay pachatas. Chauraga Jesuspam lapan ima-aygas. <sup>3</sup>Chaynuytan Jesusga Dios alisca munayniyog

cangantas shumag musyayāchimanchi, jinaman payga quiquin Diosnuymi cayansi. Chaura payga alisca munayniyogmi, chaymi ima-aygas pay ningannuyla carcayan. Paymi wanusha juchanchicunapita perdonasha cananchipag, nātan cananga Diospa derēchanchrūmi tayayan mandayar.

### Jesusga angelcunapitas mas munayniyogmi cayan

<sup>4</sup>Munayniyog angelcunas carcayanga Diospa serviglanmi, nātan Jesusga mas

munayniyogmi cayan paycunapitaga  
Diospa-mayin car. <sup>5</sup>Chaura Diosga  
manam imaysi maygan angeltas:

“Gamga cayanqui Dios-mayimi”  
nirachu ni

“Cananmi niyag Dios-mayí  
canaypag” nirapishchu.

Juclä isquirbishachrüsi manam  
maygan angeltas:

“Nogam cashag paypa Dios-mayin”,  
nätan “Paymi canga nogapa  
Dios-mayí” nirapishchu.

<sup>6</sup>Antis isquirbishachrüga chay  
japalaylan-mayinta cachraramur Diosga  
cay niyanmi:

“Lapay angelcuna payta  
alawapäcuy” niram.

<sup>7</sup>Nätan angelcunapitas Diosga cay  
niyantän:

“Angelcunaga carcayan alisca  
munayniyogmi  
alisca manchay walyaynintin räyu  
aywamugnuymi” niyanmi.

<sup>8</sup>Nätan Diospa-mayin Jesuspitaga cay  
nirmi isquirbirayan:

“Gamga mandag Diosmi canqui  
imaypita imaycamas,  
jinaman mandarsi ali ruragmi  
canqui.

<sup>9</sup>Chaymi ali ruragta cuyayanqui,  
nätan mana ali ruragcunata  
chregniyanqui.

Chaynu y captiquim nogaga  
acrarayag mandag canaypag.  
Chaymi cushirayanqui waquin  
runacunapitas mas” nirmi.

<sup>10</sup>Chaypitas isquirbishachru Diosga  
cay niyanran:

“Gam munayniyogmi galarinanchru  
jana pachatas cay pachatas ruraray.

<sup>11</sup>Chay rurangaycunaga ushacangam,  
nätan gamga imaycamas  
cawanquim.

Chaycunaga lapanmi juc jacu  
sagpinuysi ushacanga.

<sup>12</sup>Gamga lapan camangaycunata  
munangaytam rurانqui juc  
sagpi jacuta wicapagnuysi.

Nätan mushog jacuta ruragnuymi  
ima-aygatas mushogta  
ruranqui.

Nätan gamga pachalanmi cawanqui  
imay imaycamas” niyanmi.

<sup>13</sup>Diosga manam imaysi maygan  
angelcunatas

“Cay derëchäman tayucuy  
mandanaypag,  
chay chregnishugniquicunata  
naupayman chrarachimupti  
pampaman lagashtarcachir  
munangayta rurانaypag”  
nirachu.

<sup>14</sup>Antis angelcunaga cayan Diospa  
cachran ruraglam. Paycunataga  
cachramun payman yupachicugcunata  
yanapänanpagmi.

#### Jesusta cäsucushaga Diosga manam cunchuchimäshunchu

**2** <sup>1</sup>Chaymi noganchiga nä Jesuspita  
shumag mayacurayarga  
imanaypanuysi cäsucuyar cawashun  
mana pantacashanuy puriyänanchipag.  
<sup>2</sup>Sinaí jircachru angelcunaga cay  
nipäcuram: “Mana cäsucugcunataga  
Diosga cunchuchingam”. Nätan  
nipäcungannuylam Diosga cunchuchira.  
<sup>3</sup>Chaynuymi noganchitas  
cunchuchimäshun salvacug rimangan  
chay alisca ali willapata mana  
cäsucushaga. Chay willapataga Jesús  
quiquinmi naupataga musyachira, nätan  
Diospita mayacugcunas chay  
willapatam nimiranchi. <sup>4</sup>Chaura  
mayacugcunas, jinaman Diossi chay  
willapa razoncag canganta  
musyachipäcura Santu Espiritupa  
munayninwan ima-aygatas ruraypam.  
Chaynu y rurapäcura Santu Espiritu  
munangannuylam.

**Jesusga runaman muyusha  
salvamānanchi raygom**

<sup>5</sup>Chaura Diosga manam angelcunatachu “Mushogman cay pachata muyuchipty, gammi chaychru mandanqui” nira. <sup>6</sup>Antis isquirbishachruga cay niyanmi:

“Tayta Dios, ¿imanirtag gamga runacunata yarparayanqui, jinaman jana pachapita shamusha runata cuidayanqui?

<sup>7</sup>Nātan gamga chay runata nirayanqui nachrga nachrga angelcunanuy cananpagmi”.

Chaypitam niruray: “Alisca munayniyog cananpag, jinaman alisca alipag ricasha cananpag.

<sup>8</sup> Chaymi lapan ima-aygatas munayninman chruraruray mandananpag” niyanmi.

Chauraga manam imalas catushachu, nātan chay mandayangantaga manam shumag ricapunchiragchu. <sup>9</sup>Chaura cay niyangācunataga niyā Jesuspitam. Payga manam alā unaychu angelcunapita mas manacagpag ricasha cara. Manacagpag ricasha cara lapanchita cuyapāmarlanchi cunchuyar cruzchru wanurmi. Nātan cananga alisca alinninpag ricasham cayan.

<sup>10</sup>Chaynu y Jesuswan ruracara ima-aygatas Camag Dios pinsiangannuylam. Chaynu y wanunganpam cananga achca runacuna paywan cawapācunga. Chaymi canan Jesusga cayan salvacugninchi. <sup>11</sup>Chaura Jesusmi noganchitaga raquirayāmanchi Diospa runan cananchipag. Chaymi cananga cayan Tayta Diosga taytanchi Jesuspas, jinaman noganchipas. Chaymi Jesusga mana pengacular “Ayllücuna” niyāmanchi. <sup>12</sup>Chaynuymi isquirbishachru cay niyan:

“Tayta Dios, gampita willapashagmi ayllücunata”.

Jinaman “Paycunawan parējum alawashayqui” niyanmi.

<sup>13</sup>Chaypitas cay niyantān:

“Tayta Dios, nogasi gammanmi chaynuyla yupachicushay”.

Niratan:

“Caychru cayā, gam gomangay castaycunawanmi, nātan paycunaga cayan ayllücunam” niyanmi.

<sup>14</sup>Chaura Jesusga noganchinuysi runamanmi muyusha. Chaymi wanuras, jinaman chay wanunganpam juchācachimagninchi Asyagtas yalira.

<sup>15</sup>Chaynuypam Asyagpa munayninchru, Diospita raquicasha cayasha jorgamasha canchi. <sup>16</sup>Musyanganchinuysi Jesusga manam aywamura angelcuna yanapagchu, antis aywamura noganchi Abrahampa castancunata

yanapāmaginchim. <sup>17</sup>Chaymi Jesusga noganchinuy runaman muyura. Chaynuypam payga cara Diospa sacerdotin, alisca cuyapacug, jinaman Dios ningannuy cawag. Chaura Jesusga lapan runacunapa juchanpita wanura, Dios mana piñasha cananpagmi.

<sup>18</sup>Payga noganchinuy runa carmi juchācachiy munashas cara, nātan manam juchācushachuga. Chaymi yanapāmanchi paynuysi mana juchaman ishquinanchipag.

**Jesusga Moisespitas mas  
munayniyogmi cayan**

**3** <sup>1</sup>Nātan Dioslata servig-mayücuna, gamcunataga quiquin Diosmi acrararcayāshunqui paypa runan capācunaypag. Chauraga shumag tantiapācuy Jesuspita. Paytam Diosga cachramura paypita mas shumag musyachimānanchipag, jinaman paymi cayan sacerdotícunapa mas

mandagnincagsi yupachicunanchipag.

<sup>2</sup>Tayta Diosmi Jesustaga chaynuy cananpag chrurara. Nätan Jesusga Dios munangannuy lam imatas lapanta rurara. Chaura Moisesga cara juc capuralnuysi Diospa serviglanmi. <sup>3</sup>Chaymi Jesusga Moisespitas mas alawasha canman, wayi ruragtachu alisca alawänanchi wayi quiquinpitas mas, chaynuy alawasha cachun. <sup>4</sup>Lapan wayicunas runacuna ruranganmi cayan. Nätan runacunataga, jinaman lapan ima-aygas cayagcunataga Diosmi camara. <sup>5</sup>Nätan Moisesga Diospa servignin carmi Dios ningannuy la ima-aygatas rurara juc capuralnuysi Diospa runacunachru. Chaymi Moisesga musyachira mas guepaman Dios ningannuy la Jesuswan ruracänantas. <sup>6</sup>Nätan Cristoga cayan Diospa-mayinmi. Chaymi cananga paylapa cayan lapan ima-aygas. Chaura noganchiga cayanchi paypa runanmi. Chaymi payman yupachicuyälar shuyacuyäshun cushisha cawananchipag.

<sup>7</sup>Caynuyta tantiachipäcushay, Santu Espiritum isquirbichira Dios ninganta. Payga cay niram:

“Dios nircayäshungayta canan mayarcayarga cäsucurcay.

<sup>8</sup> Ama rumi shongo capäcuychu unay awilluycunanuy mana cäsucugga.

Paycunaga chunyang pampachru cayar

Diosta manam cäsucurcarachu.

<sup>9</sup> Chaychru unay awilluycunaga ‘Diosga gongaramanchim’ nirmi,

lutanta rimapäcura chay chruscu chrunca watantin

ima-aygata munayniwan paycuna ricananpag rurayaptäsi.

<sup>10</sup> Chaymi chay runacunapagga alisca piñäcusha cä.

Jinaman cay nirä: ‘Paycunaga imaysi shongon munangannuy lam cawapäcun, manam noga munangänuychu’ nirä.

<sup>11</sup> Chaymi paycunapag piñasha carga juracururä cay nir: ‘Paycunaga Canaán ninganchru ali cawacuyman manam imaysi yaycapäcungachu’ nir”.

<sup>12</sup> Jesusman yupachicug-mayïcuna, mayapäcuy cayta: Ama gamcunachru maygaysi rumi shongo capäcuychu Diosman mana yupachicugcama ni amatag raquicapäcuybishchu Cawag Diospitas. <sup>13</sup> Antis jucniquis jucniquis alila cawayäshun ninacurcay lapan junagsi. Chaynuy ninacurcay jucla, rumi shongoman muyurur mana juchaman ishquipäcunaypag.

<sup>14</sup> Noganchiga Jesuswanmi cawashun, naupantanuy si payman yupachicuyälar wanunganchicamas carga. <sup>15</sup> Chaura isquirbishachrüga cay niyanmi:

“Dios nircayäshungayta canan mayarcayarga cäsucurcay.

Ama rumi shongo capäcuychu unay awilluycunanuy mana cäsucugga” niyanmi.

<sup>16</sup> Chauraga ¿pücunatag capäcura Diospa willapanta mayayarsi mana cäsucugga? Paycuna capäcura Egipto marcapita Moisés lapan yargachimunganmi. <sup>17</sup> Nätan

¿pücunapagtag Diosninchi piñasha cara chruscu chrunca wata? Chay

juchäcurcur chunyang pampachru

wanusha runacunapagmi. <sup>18</sup> Jinaman

¿pücunapagtag Dios juracurura cay nir:

“Paycunaga Canaán ninganchru ali cawacuyman manam imaysi yaycapäcungachu” nir? Chay nira mana cäsucugcunapagmi.

<sup>19</sup> Musyanganchinuy si paycunaga mana yaycapäcurachu Diosman mana yupachicurcanganpitam.

**Imanuypanuyisi Diosta  
cäsucuyäshun paywan  
cawananchipag**

**4** <sup>1</sup>Chauragar cäsucurcay “Chay ali cawacuymän yaycapäcunquim” Dios niyämashaga. Chaura maygaysi guepa caräinquinmantag. <sup>2</sup>Noganchitas unay awillunchicunata ali willapata musyachingannuyimi musyarayächimanchi. Chayta mayacurarcayarsi paycunaga manam cäsucucarachu. Chaura chay mayacurcangan manam välishachu. <sup>3</sup>Nätan Diosman yupachicunganchipam, chay ali cawaymanga nä yaycurayanchi. Chaura mana yupachicugcunapagmi isquirbishachrüga Dios cay niyan:

“Nogaga piñasha cayar juracururä chay ali cawacuymän manam paycunaga imaysi yaycapäcungachu nirga” niyan.

Chaura chay mana cäsucugcunaga manam imaysi aliga capäcungachu, galayunanchru ima-aygatas camarcur Dios alisca cushisha cananpagnuyga. <sup>4</sup>Chaynuymi isquirbishachrüsi ganchris junagpitaga cay niyan: “Diosga ima-aygatas rurayta ushacurcur ganchris junagchrüga cushisham cara” niyanmi.

<sup>5</sup>Nätan yapaysi isquirbishachrüga cay niyantän:

“Chay mana cäsucugcunaga manam imaysi yaycapäcungachu chay ali cawacuymanga” niyantän.

<sup>6</sup>Chaura waquinsi yaycapäcunmanran chay ali cawaymanga. Nätan naupata chay ali willapa mayacugcunaga mana yaycapäcushachu, mana chayta cäsucurcarmi. <sup>7</sup>Chaura Diosga

“Canan yaycapäcuy chay ali cawayman” niyämanchim.

Chaypitaga mas guepatas David isquirbira cay nirmi:

“Dios nircayäshungayta canan mayarcayarga, ama rumi shongo capäcuychu” nirmi.

<sup>8</sup>Nätan Josué chay ali cawacuymän Israel castanchicunata razonpa yaycachisha captinga, manachr Diosga ninmanchu cara: “Mas guepamanga chay ali cawacuymän yaycapäcungam” nirga. <sup>9</sup>Chaura chaynuy nirayaptinga ali cawayman yaycapäcunmanran Diospa runacunaga. <sup>10</sup>Chaura Dios ningannuy ali cawayman yaycugcunaga cushisham capäcunga. Dioschu ima-aygata galayunanchru rurayta ushacurcurga cushisha cara chaynuymi. <sup>11</sup>Chauragar imanaypa ayganaypas chay ali cawayman yaycuyta munapäcuy, nätan ama chay unay awillunchicunanuy mana cäsucugga capäcuychu.

<sup>12</sup>Chaura Diosninchipita willapaga yachrachimanchi imaycamas Dioswan cawananchipitam. Chay willapaga cayan caynuymi: Juc runachu juc espäda ishçay lädüpa cuchucunayogwan ruyi ruyicama tucsirunman. Chaypitas mas ruyi ruyicamam yaycun juc runaman Diospa chay ali willapanga. Chaura chay willapam tantiachimanchi ali rurayta u lutan rurayta munayanganchitas. <sup>13</sup>Dios camangancunaga ima-aygas cayan ricashalam paypitaga. Chaymi ali u lutan ruranganchitas quiquinchi nishun.

**Jesugsa cayan lapan  
sacerdötöcunapita mas  
alinnincagmi**

<sup>14</sup>Chaura Diospa-mayin Jesusga cayan sacerdötöcunapita mas mandagnincagpitas mas munayniyogmi. Payga jana pachamanmi yaycurayan. Chauragar payman yupachicuyälar cawayäshun. <sup>15</sup>Sacerdötöcunapita mas mandagnin Jesusninchiga manam rircaramanchichu ima juchaman yaycuyashas, antis payga

juchäcachiy munasha casha cuyapälarmi yanapämanchi quiquinsi juchäcachiy munasha car. Nätan payga noganchinuy juchäcachiy munasha cayarsi manam juchäcurachüga. <sup>16</sup>Chauragar cuyapäcug Dioscagman ashuyushun cuyapämänanchipag, jinaman payman yupachicuyälar cacuyäshun ima-ayga captinsi cuyapämarlanchi yanapämänanchipag.

**5** <sup>1</sup>Sacerdöticonapa mas mandagnincagga capäcura pisi achca runacunapita acrasham. Payga chay runacunapa ofrendancunatam, jinaman juchancunapita perdonasha capäcunapag yawar apapäcungantam Dios cacunanman yaycarchir Diospag rupachipäcug juchancunapita perdonasha capäcunapag. <sup>2</sup>Chaura chay sacerdöticonapa mas mandagnincagga canman cuyapäcugmi chay juchäcusha runacunapag, quiquinsi juchaman ishquipäcuglarag cayarga. <sup>3</sup>Chaynuy carmi payga quiquinpa juchanpita, jinaman runacunapa juchanpita ofrendata apacurcur yaycug Dios cacunanman perdonasha capäcunapag.

<sup>4</sup>Paycunaga manam quiquinchu “Sacerdöticonapa mas mandagnin capäcushag” nipäcug, antis Diosmi paycunataga acrasa Aaronta yupaysi. <sup>5</sup>Nätan Cristosi manam “Noga cashag sacerdöticonapa mas mandagnincag” nirachu, antis Diosmi chrurara:

“Gamga cayanqui Dios-mayimi,  
Cananmi niyag Dios-mayí  
canaypag” nir.

<sup>6</sup>Jinaman juclä isquirbishachrüsí cay niyanmi:

“Gammi canqui sacerdöticonapa mas mandagnincag imay imaycamas,  
nätan canqui sacerdoti  
Melquisedecnuymi” niyanmi.

<sup>7</sup>Cay pachachru cayar Cristoga gapachracuypanuyumi wagaräcur

manacura wanuy pita washacug Diosta: “Tayta, yanapämaynar cay alisca juyu cunchuy awantayta” nir. Nätan Dios munangannuy cawag captinmi Diosga manacungannuy yanaparura payta.

<sup>8</sup>Jesugsa Diospa-mayin cayarsi cäsucug carmi cunchuras, wanuras. <sup>9</sup>Chaynuy cäsucug captinmi Diosga “Gammi canqui sacerdöticonapa mas mandagnin” nirura. Chaymi payga cayan chay cäsucugcunapa salvacugin.

<sup>10</sup>Chaura Tayta Diosga Jesusta chrurarayan sacerdöticonapa mandagnin cananpag sacerdoti Melquisedecnuymi.

<sup>11</sup>Caycunapita maymayragchri cayan rimapapäcunapag, nätan caycunapita tantiachiyga alisca sasam, gamcuna mana cäsucug capäcuptiqui.

**Gamcunaga alisca yachraginmi  
jinaman yupachicugmi  
capäcunquiman**

<sup>12</sup>Caychica unaytaga gamcunaga nämi Cristopita ali yachrarcayächinquiman, nätan gamcunaga Diospita naupacag mayacurcangalaytam yaparcur yaparcur yachrachinata munarcayanqui. Gamcunaga lechilatam upyayta munarcayanqui, nätan manam juc micuycunataga munapäcunquichu. <sup>13</sup>Pi maysi naupa yachracungalanta yaparcur yaparcur yachrachinata munagcunaga juc inasha lechilawan cayagnuyran carcayan. Chaymi mana tantiapäcunragchu ima ali u ima lutan cangantas. <sup>14</sup>Nätan chacha runacunaga juc micuytam micapäcun. Chaynuymi capäcun chay waquin yachrachiycunata yachracugcunaga. Chauraga shumagmi tantiapäcun ima ali cangantas u ima lutan cangantas.

**6** <sup>1</sup>Chaura naupata Cristopita yachracungalanchitaga ama yachracuyäshunchu, antis sasanninta yachracushun Diospita mas shumag

musyananchipag. Nätan ama gongashunchüga chay naupata yachracunganchitaga. Chaycunaga caycunam cara: chay lutan ruraycuna wanacuypitam, Diosman yupachicuypitam, <sup>2</sup>bautizacuypitam, mandag cananpag umanman maquita chruraypitam, wanushacunata Dios cawacächimunapitam, jinaman runacuna ali rurag u lutan rurag capäcungantas Dios taripänanpitam. <sup>3</sup>Nätan Dios munaptinga chay waquin niyangäcunata yachrachipäcushaymi. <sup>4</sup>Nätan Diosman yupachicuyanganpita guepaman cutishacunaga manam nä imanacursi yapay wanacuyta atipapäcungachu. Paycunaga nämi musyapäcun Cristowan ali cawaypitas, Santu Espiritu munayninchru cawaypitas, <sup>5</sup>Diospita mayacurcangan willapa ali shumag canganpitas, jinaman mas guepaman Diospa munayninwan ima-aygata rurananpitas. <sup>6</sup>Chaycunata musyarcayarsi guepaman cutishacunaga manam imanacursi yapay wanacuyta atipapäcungachu, ayga cuti Cristopita rimapayashas. Chaynu y jinarga Diospa-mayin Cristota yapay cruzchru wanuyächignuyymi cunchurcayächin chay waquincunanuyysi. Chaynuypaga Cristota lutanpagmi ricarcayächin runacunawan.

<sup>7</sup>Mä tantiachipäcushay caynuypa: Juc chracrachru guewaga tamyaramuptin alim wiñamun. Chay tamyarachimur Diosga alitam rurarun chay chracrata. Chaura chay chracrayogsi cushisham cayan. <sup>8</sup>Nätan cashacunala wiñag chracraga lutanpag ricasham cayan, jinaman chay cashacunata rupachinchim. Chaynuymi Diosman yupachicugcunas Dios munangannuy mana cawagga Diospita cunchuchisha capäcunga, nätan Dios munangannuy cawagga yanapasha capäcunga.

<sup>9</sup>Cuyashäcuna, chaynu y nirga, manam gamcunapagchu niyä. Gamcunaga alitachr rurapäcunqui Dios munangannuyysi nä salvasha carcayarga. <sup>10</sup>Alila rurag Diosga manam gongancho payta cuyar, runancunata yanapapäcungaytas, jinaman canan yanaparayangaytas. <sup>11</sup>Chauraga jucniquis jucniquis, chaynuyla rurarcayay wanupäcungaycamas. Chaynu y cawarga Dios “Goshaymi” nipäcushungaytaga chrasquipäcunquim. <sup>12</sup>Chaura ama guellanapäcuychu, antis Diosman yupachicugcunata rircärir cawapäcuy. Paycunaga chaynu y yupachicuyälar cawapäcunganpam Dios “Goshaymi” ninganta chrasquipäcura.

<sup>13</sup>Mä yarpachipäcushay Abrahampita. Abrahamta rimapar Diosga quiquinpa jutinta janchrarcarmi juracurura paypita mas munayniyog mana pisi captin. <sup>14</sup>Diosga cay niyanmi: “Alisca aliscam nogaga yanapähayqui”, jinaman “Alisca chrantinmanmi castaytas mirachishag” niram. <sup>15</sup>Chay ninganman yupachicuyälar cawanganpam Abrahamsi Dios “Goshaymi” ninganta chrasqira.

<sup>16</sup>Musyanganchinuyysi runacunaga juracurcan quiquinpitas mas munayniyogpa jutinta janchracurmi. Chaynu y juracururga manam nä mastaga imatas ninacurcanchu. <sup>17</sup>Runacuna chaynu y juracurcaptinmi Diossi chaynu y juracura ningannuyyla rurananpag, jinaman ningannuylam ruraras Diosga. <sup>18</sup>Chaura Diosga “Goshaymi” nirayarga, jinaman juracurayarga ningannuylam ruranga, payga manam casquipämashunchu. Chauraga Diosman yupachicug canganchipita ima-aygatas dëjarayarga, chaynuyla shuyarayashun Dios “Goshaymi” ninganta chrasquinganchicama. <sup>19</sup>Juc ancla

ninganchu büquita chariran pachalanchru cananpag. Chay anlanuyumi noganchipagga cayan Dios “Goshaymi” nimanganchita shuyayanganchiga. Chaymi cananga yaycushun Dios cacunancagman. Chauraga manam raquimanchichu chay racta telonnuy cayagsi. <sup>20</sup>Chaypagmi Tayta Dios cayanganman Jesusga yaycurayan noganchipita manacunanpag. Paymi cayan sacerdötücunapa mas mandagnin sacerdöti, imay imaycamas Melquisedecnuysi.

#### Jesusga cayan Melquisedecnuysi

**7** <sup>1</sup>Cananga masta willapayärishay Melquisedecpita. Melquisedecga cara Salem marcachru reymi, jinaman paytaga Munayniyog Diosmi chrurara sacerdöti cananpagsi. Melquisedecga Abraham taripacugmi yargorura. Nätan Abrahamga cutiyämura guërrachru reycunata yalircurmi. Chaychrümi tincurur Abrahamga janan Diosta manacurura. <sup>2</sup>Nätan Abrahamsi Melquisedecta raquiparura guërrachru yalircur lapan ima-aygatas apayämunganpita chruncapita juctacamam. Melquisedecga ‘Ali rurag rey’ ninanmi, nätan ‘Salem marcachru rey’ ninanga, ‘Alila cawachimagninchi rey’ ninanmi. <sup>3</sup>Melquisedecpita manam isquirbishachru nimanchichu pi taytan, pi maman, pi casta cangantas, ni imay näcingantas, jinaman imay wanungantas, antis payga cara Diospa-mayinnuyumi. Chaura payga cayan sacerdötüm imay imaycamas.

<sup>4</sup>Chaura shumag tantiasha Melquisedecga cayan alisca alinninmi. Chaymi Abrahamsi Israelpa taytan nisha cayarsi chay guërrachru yalircur ima-aygatas lapan apayämunganpita chruncapita juctacama raquiparura.

<sup>5</sup>Abrahampa castanmi cara Levüga, nätan Levüpa castancunam sacerdötücunaga capäcura. Chaymi runacunaga lapan charapäcunganpita chruncapita juctacama raquipapäcug Moiseswan Dios isquirbichinganchru chaynu y nisha captin. Chaura chrasquipäcug Abrahampa castancunalapitam, manam juccunapitaga. <sup>6</sup>Nätan Melquisedecga mana Levüpa castan cayarmi chrasquirura chruncapita juctacama Abraham raquipaptin. Jinarcurmi Abrahamta Diosga “Aliscam yanapashay” nä nirayaptin, mastarag nirura Melquisedecsi Dios yanapänanpag. <sup>7</sup>Chaynuypam musyayanchi mas alinnincag runa, jucnin manacag runata “Dios yanapëshunqui” ninganta. <sup>8</sup>Levüpa castan chay chruncapita juctacama chrasquigcunaga wanuglam capäcura. Nätan Melquisedecpita “Cawayanran” niyämanchim isquirbishachrüga. <sup>9</sup>Chaura Abrahamga Levü castacunata raquipänan trucam gorura, chay Levücuna manarag cayaptinsi. Chaypin paycuna capäcurga chay chruncapita juctacama chrasquipäcunganpitam raquipapäcunman cara Melquisedecta. <sup>10</sup>Nätan Melquisedec Abrahamta taripag yargonan wichan Levüga manaran cararagchu ni castancunas.

<sup>11</sup>Levü casta sacerdötücunata cäsucurchu, Israel castanchicuna mana juchaynagman muyupäcunman cara. Chaura manam canmanchu cara juc sacerdöti Melquisedecnu. Nätan sacerdötiga manam aywamun Aaronpa castanpitachu. <sup>12</sup>Diosga “Jucmi sacerdötiga canga, jinaman chay sacerdötiga mushogtam yachrachipäcushunqui cäsucurcänaypag” niram. <sup>13</sup>Chay sacerdöti aywamugga Jesusmi cayan.



Payga Judá castapitam aywamun, nātan Judá castapitaga manam pisi sacerdoti carachu. <sup>14</sup>Munayniyog sacerdotinchiga aywamun Judāpa castanpitam, nātan pay castapita sacerdoti aywamunantaga manam Moissesi nirachu.

<sup>15</sup>Chaynuy paga musyayāchimanchi chay Melquisedecnuysi mushog sacerdotinchi cangantam. <sup>16</sup>Jesuga sacerdoti cayan manam Levīpa castan canganpachu, antis munayniyog car imay imaycamas cawag canganpam.

<sup>17</sup>Chaymi isquirbishachrūsi cay niyan:

“Gammi canqui sacerdotícunapa mas mandagnincag imay imaycamas, nātan canqui sacerdoti Melquisedecnuymi” niyan.

<sup>18</sup>Chaynuy carga Dios unay sacerdotícunapita ningacunaga manacagmanmi muyurun. Moisés isquirbingancuna mana juchaynagman runacunata mana muyuchingapita. <sup>19</sup>Chaura Moisés isquirbingancunaga manam runacunata mana juchaynagman muyuchishachu. Antis cananga Jesús sacerdotinchi canganpitaga nā cawayanchi Dioswanmi imaycamas.

<sup>20</sup>Nātan Diosga juracuypam nira Jesús sacerdoti cananpag. <sup>21</sup>Nātan waquin sacerdotícunapagga manam Diosga juracurachu cay nir:

“Gammi canqui sacerdotícunapa mas mandagnincag imay imaycamas” nir.

Nātan Munayniyog Dios chaynuy juracuypa nirayarga manam manacagman muyuchingachu.

<sup>22</sup>Chaymi Jesuga “Tayta Diosga chay rimangannuy lam ruranga” niyāmanchi.

<sup>23</sup>Sacerdotícunaga achcam capācura, nātan paycunaga limpum wanupācusha.

<sup>24</sup>Nātan sacerdotinchi Jesuga imay imaycamas cawagmi. Paylam imay

imaycamas sacerdotiga canga. <sup>25</sup>Chaymi Jesuga salvanga payman yupachicur Tayta Diosman ashuyugcunata. Payga imay imaycamas cawacugmi, jinaman Diostam manacuyan chay yupachicugcunapa janan.

<sup>26</sup>Noganchiga sacerdotícunapa mas mandagnin Jesustam munacunchi. Payga Dioslapag cawagmi. Payga manam ima lutantas rurashachu. Payga mana pasay juchaynagmi, payga manam juchasapacunanuychu cawaras. Jinaman payga alisca shumag Tayta Dios cayangancagmanmi yaycurayan. <sup>27</sup>Payga manam sacerdotícuna mandagcunanuychu uywacunata rupachira juchanpita, ni runacunapa juchanpitas. Antis payga quiquinmi cruzchru juc cutila wanura lapan runacunata salvananpag. <sup>28</sup>Moisés isquirbinganga musyachimanchi caytam: Chaypin wichan Diosga chrurara sacerdotícunapa mandagnincunata noganchinuysi juchaman ishquipācugcunalatam, nātan Diosga juracuypam nirayan, mana juchaynag chay Dios-mayin Jesús imay imaycamas sacerdoti cananpagga.

#### Caymi cayan mushog rimanacuy

**8** <sup>1</sup>Chay lapan nircayangagpitaga mas alinninmi cayan Jesuga. Payga cayan sacerdotícuna mandagpitaga mas alinnincag sacerdotinchim. Payga jana pachachru Diospa derēchanchrūmi tayayan mandananpag. <sup>2</sup>Chaychrūmi Jesús sacerdotiga noganchipa nanchi Diosta manacuyan Diospa razoncag wayinchru. Chay wayiga Munayniyog Dios ruranganmi. Manam runala rurangancho.

<sup>3</sup>Sacerdotícunapa mas mandagcagga pisi cayan Moisés isquirbingannuy ofrendacunata, jinaman uywacunapa yawarninta apacurcur Dios cacunanman

yaycunanpagmi, chaynuypa runacunapa juchan perdonasha cananpag. Chaynuymi Jesussi Dios cayanganman

yaycunanpagga ofrendata apacurcur yaycurayan runacuna juchanpita perdonasha capäcunanpag. <sup>4</sup>Cay pachalachru carga, Jesusga manam sacerdotichu canman cara. Cay pachachrüga achcam sacerdotícunaga carcayan Moisés isquirbingannuy ofrendacunata “Cayga gampam cayan” Tayta Diosta nipäcunanpag. <sup>5</sup>Cay pachachru sacerdotícunaga chay lapantas rurarcayan jana pachachru Diospa wayinta ricapungannuy rurashalachrümi Jesús rurayangannuy. Chay garapita rurasha Diospa wayinchru

rurapäcungantaga musyayanchi Moísesta: “Sinaí jircachru ricapachingagnuy lam lapanta ruranchi” Dios ninganpam. Chaynuy nira Moisés nä Diospa wayinta sharcachinanpag cayaptinmi. <sup>6</sup>Nätan Jesusga mas alitam rurayan unay sacerdotícuna rurapäcunganpitaga. Payga Dioswanmi amistarayächimanchi. Chaymi cananga “Mas yanapasham capäcunqui” nirayämanchi Diosga.

<sup>7</sup>Chaura Israel castacunawan naupata rimanacurcangan ali captinga Diosga manam “Juctaran rimanacushag” nimanchu cara. <sup>8</sup>Chaura chay lapan cäsucuyta mana atipapäcuptinmi Diosga cay nira:

“Shumag mayamay: Guepamanmi rimanacushag Israelwan, jinaman Judá castacunawan. Chayga mushog rimanacuymi canga.

<sup>9</sup>Chay rimanacuypa manam canga unay awilluncunawan Egiptopita jorgamur rimanacungänuychu.

Paycunaga rimanacurcangänuy manam cäsucuyta atipapäcurachu.

Chaymi nogaga manacagpag ricayä” niram Munayniyog Diosga.

<sup>10</sup>Chaura Diosga

“Mas guepaman chay mushog rimanacuychrüga

Israel castacunata cay niram:

“Nogaga mandangäcunata

shumagmi tantiachishag lapan ningäta cäsucarcämänanpag.

Chaura paycunaga runäcunam canga,

nätan nogam Diosnin cashag’.

<sup>11</sup>Chauraga lapanmi walashpita

galayur chachacama

‘Paymi Diosninchiga’ nir, servipäcamanga.

<sup>12</sup>Chaura nogaga ima juchanpitas

cuyapälarmi perdonashag.

Manam ima juchantas

yarpashagchu” niram.

<sup>13</sup>Chaura “Mushogtaran

rimanacurcäshag” Dios nirayaptinga,

chay unay rimanacurcanganga

manacagmanmi nä muyurun, jinaman

nä illacagpagmi cayansi.

#### **Cristoga cayan mas alinnincagmi Dioswan amistächimagninchi car**

**9** <sup>1</sup>Chaura chay naupacag rimanacuychru Diosga cay niyanmi:

“Ningänuy lam servimanqui, jinaman ningänuy lam wayitas ruranchi” niram.

<sup>2</sup>Ningannuy lam Diospa wayintaga

rurarura garapita jatunta. Chay wayi

ruyichrüga cara candelërum, jinaman

mësachrümi cara ‘Diospag’ nisha tantas.

Chaycunaga cara Dioswan

rimanacagchrümi. <sup>3</sup>Chay mas ruyicag

telón washanga Dios cacunanmi cara.

Chaychrümi Dioswan rimapäcug.

<sup>4</sup>Chaychrümi cara juc altar örupita

rurasha inciensu rupachicuna, jinaman

caratan juc cajón örupita rurashas.

Chaychrüga wiñarara Dioswan

rimanacurcangan isquirbisham, jinaman örüpita rurasha juc mancachrümi cara ‘manä’ jutiyog micuy. Nätan caram Aaronpa waytag väransi. <sup>5</sup>Chay cajonnuysi cayag ‘arca’ jananchru cara ángel nirayagcuna rurasham, alisca alisca shumag. Chay angelpa raprancuna chapapäcug Diospita cuyapasha capäcunancag chay arcatam. Chaypita rimapayta munapti mayamaychri cayan, antis cananga jucpita rimapapäcushay.

<sup>6</sup>Nä chaynuy chrurachracarcäir sacerdotícunaga mas caylä yaycunalamanmi imayüra aygayüras yaycapäcug. Chaychru ruranancunata rurapäcunanpag. <sup>7</sup>Nätan mas ruyicag telón washancagmanga watachru juc cutilam chay sacerdotícunapa mas mandagnincagla yaycug. Payga yaycug yawarta apacurcurmi quiquinpa juchanpitas, jinaman mana shumag musyar Israel castanchicuna juchäcurcanganpitas perdonasha capäcunanpag. <sup>8</sup>Chaynuy carga Santu Espirituga musyayächimanchi chay telón cayangancamaga Dios cacunan ruyiman mana lapanchi yaycuy atipänanchitam. <sup>9</sup>Chaycunaga lapansi cara Jesús ruranganta musyanalanchipagmi. Chaura cananga musyayächimanchi chay ofrendacuna apagcunapitas, jinaman uywacunata Diospag apagcunapitas pachalan juchayogla capäcungantam. <sup>10</sup>Nätan imatas micuycuna, upyaycuna, maqui maylacuycuna, jinaman juc ruraycuna, runa ningalan car ushacagla cangantam.

<sup>11</sup>Nätan sacerdotícunapa mas mandagnin Cristo aywarcamur cuticurga Diospa naupanmanmi jana pachaman yaycura. Chay jana pacha Diospa wayinga manam runala ruranganchu. Chaura chayman yaycurga alisca alitam rurarayan

noganchipag payga. <sup>12</sup>Jesugsa manam chivacunapa, jinaman becërrucunapa yawarninta apacurcurchu Diospa naupanman yaycura, antis pay quiquinmi cruzchru yawarninta jichrar wanura juc cutila lapan runapa janan. Chaynuy ruranganpam nä imay imaycamas salvasha cayanchi. <sup>13</sup>Unayga juchäcusha runacunataga chivacunapa, törucunapa yawarninwanmi, jinaman becërru rupashapa uchrpanwan tacurcachirmi lushipäcug imaysi “Diospa naupanchru ali cananpag” nir ruranganpitaga <sup>14</sup>mas alitam rurarayan Cristoga cruzchru quiquin wanur yawarninta jichrar. Chaynuy wanura Santu Espiritu yanapaptinmi, jinaman wanuras mana juchaynag cayarmi. Chaynuy wanunganpam cananga chay ima-aygatas yangala ruranganchicunapita perdonayämanchi razonpa imaycamas cawag Diosta servicunanchipag.

<sup>15</sup>Chaura mushog rimanacuychrüga Cristom cayan Dioswan amistächimagninchi. Chaymi Cristo wanura naupacag rimanacuyta mana lapan cäsucuyta atipapäcuptin perdonasha capäcunanpag. Pay wanunganpam Dios ningannuysi cananga paywan imaycamas cawapäcunga paycunas.

<sup>16</sup>Musyanganchinuysi juc runa cawayälar testamentunta ruracuruptinga, chay testamentunga välin chay runa wanuruptinran. <sup>17</sup>Chaura chay testamentu ruracug cawayaptinga, chay testamentunga manam välinchu. Välinga nä wanuruptinran. <sup>18</sup>Chaynuymi naupacag testamentu välinanpagsi uywacunapa yawarnintarag wichipäcug. <sup>19</sup>Chaura Moisesga Israel castanchicuna imanuy cawapäcunanpagsi yachrarcachirga caycunatam rurara: Payga puca milwata

gueruman wancurcurmi becërrupa, jinaman chivacunapa yawarninta yacuwan talurcachir chagchug cara, chaychru cayag quiquin Moisés isquirbingancunatas, jinaman lapan runacunatas. <sup>20</sup>Chaypitam payga cay nira: “Cay yawartaga chagchuyä Dioswan rimanacunganchi testamentu välinanpagmi” nir. <sup>21</sup>Chaynuytan chagchura Diospa wayin garapita rurashatas, jinaman chaychru ima-ayga cayagcunatas. <sup>22</sup>Chaura Moisés isquirbingannuyga imatas yawarwanran chagchupäcug Diospa naupanchru ali cananpag, jinaman runacunatas juchanpita perdonasha capäcunanpag.

**Cristoga wanusha  
salvamänanchipagmi**

<sup>23</sup>Chauraga chaynuyrän chagchupäcug yawarwan imacunatas Dios alipag ricananpag. Nätan chayga cara imanuyä jana pachaman Jesús yacunantas musyachimaglanchim. Nätan Cristo quiquinmi yawarninta jichrar wanura Dios alipag ricamänanchipag. <sup>24</sup>Chaura Jesusga manam yaycura Diospa chay wayinmanga runala ruranganmanchu, antis jana pachamanmi. Chaychrümi Diosta manacuyan noganchipa jananchi. <sup>25</sup>Cay pachachru sacerdotícunapa mas mandagnincagga wata watam yaycapäcug Diospa wayinman yawarta apacurcur. Nätan jana pachachru Cristoga juclay cutilam wanusha yawarninta jichrar jana pachaman yaycunanpag. <sup>26</sup>Mana chaynuy captinga achca cutichr wanunman cara yawarninta jichrar Cristoga cay pachata Dios ruranganpita-pachaga. Antis cay guepantaran Cristoga aywamura juclay cutila yawarninta jichrar wanunganpa juchanchipita perdonasha cananchipag. <sup>27</sup>Chaymi runaga juclay cutila

wanunchi. Chaypitaga Diosmi juchanchita taripämashun.

<sup>28</sup>Chaynuymi Cristosi juclay cutila wanura runacunapa juchancunata perdonänanpag. Chaypita nä yapay cutimurga manam cutimunga wanunanpagchu antis shuyararcayag runancunata pushacunanpagmi.

**Jesucristo wanunganpam Diospa  
runan cayanchi imaycamas**

**10** <sup>1</sup>Chaura Moisés isquirbingancunaga cayan mas guepaman juc alinnin aywamunanta musyachimagninchim. Chaymi Moisés isquirbingancunata cäsucurcayarsi ali cawagmanga mana muyupäcurachu uywacunata wanurcachir Diospag wata wata ruparcayächiptinsi. <sup>2</sup>Chaura Moisés isquirbingancunata cäsucurchush runacuna mana juchaynagman muyupäcunman cara. Chauraga manam uywacunapa yawarninta jichrapäcunmanchu cara juchancunapita perdonasha capäcunanpag. <sup>3</sup>Antis wata wata uywacunapa yawarninta jichrapäcurga yarpapäcug juchäcurcangantam. <sup>4</sup>Chaynuy rurarcayaptinsi törucunapa, jinaman chivacunapa yawarninga manam mana juchaynagman muyuchirachu.

<sup>5</sup>Chaymi Jesusga cay pachaman aywamur Dios Taytanta cay nira:

“Gamga manam ofrendacunatas ni uywa wanushacunatas munanquichu.

Antis nogaga juc runanuymi aywarayämü runacunapa janan wanunäpag.

<sup>6</sup> Gamga manam munanquichu ofrendacunata rupachipäcunantas, ni juchancunapita perdonasha cananpag uywacunata wanuchipäcunantas,

chaynuypa juchancunapita  
perdonasha capäcunapag”.

<sup>7</sup>Chay nircurmi payga cay nira:  
“Caychru cayä Tayta,  
isquirbishachru ningannuysi  
gam munangayta ruranäpagmi”  
nira.

<sup>8</sup>Chaura Jesusga cay niyanmi  
naupataga: “Gamga manam  
munanquichu ofrendacunata  
rupachipäcunantas, ni juchancunapita  
perdonasha cananpag uywacunata  
wanuchipäcunantas” Moisés  
isquirbinganchru nirayaptinsi.

<sup>9</sup>Chaypitas Jesusga cay niraran:  
“Caychru cayä Tayta, gam munangaynu  
ruranäpagmi”. Niptinmi Diosga chay  
unay ruraycunata illacarachin mushog  
rimanacungancunata rurananpag.

<sup>10</sup>Chaura Jesusga cruzchru wanura  
Dios munaptinmi paylapag  
cawananchipag. Payga chaynuypa wanura  
juclay cutilam, nätan manam  
wanungachu mastaga imaysi.

<sup>11</sup>Sacerdötícunaga waran waranmi  
uywacunata Diospag rupachipäcun,  
nätan chaynuypa rurarcayaptinsi manam  
runacunata mana juchaynagman  
muyuchinchu. <sup>12</sup>Cristom ichaga juc  
cutila cruzchru wanura nä imay  
imaycamas salvasha cananchipag.  
Jinarcurmi cananga Diospa  
derëchanchru tayayan mandananpag.  
<sup>13</sup>Chaychrümi Jesusga shuyarayan lapan  
chregnipagnincunata naupanman  
chrächingancama. <sup>14</sup>Chaura cruzchru  
juclay cutila wanunganpam pasay mana  
juchaynagpag ricayämanchi imay  
imaycamas lapan acrashancunata  
Diosga.

<sup>15</sup>Chaynuypa ricamänanchipitaga Santu  
Espiritus musyayächimanchi shumagmi  
Dios cay ninganta:

<sup>16</sup>“Mas guepanman paycunawan  
rimanacur cay nishagmi

‘Nogaga mandashäcunata  
shumagmi tantiachishag  
cäsucarcämänanpag’ niram.

<sup>17</sup>Chaypitas niyantant:  
‘Nogaga manam imaysi  
yarpashagchu ima-aygata  
juchäcurcangantas’ niyantant”.

<sup>18</sup>Chaura nä lapan juchacunata Dios  
perdonaruptinga manam uywacunata  
rupachinaragchu juchancunapita  
perdonasha capäcunapag.

<sup>19</sup>Chaura Diosman  
yupachicug-mayïcuna, Cristo cruzchru  
yawarninta jichrar wanunganpam  
cananga nä yaycuyanchi Diospa chay  
cacunancagman mana mancharilar.

<sup>20</sup>Mas unayga manam pisi yaycurachu  
chayman, nätan cananga Cristo quiquin  
chaynuypa wanunganpam nä yaycuyanchi  
Diospa chay cacunanman. <sup>21</sup>Chaymi  
cananga sacerdotícunapa mas  
mandagnincag Jesucristoga noganchi  
Diospa runancunapag manacuyan.

<sup>22</sup>Chaura nä chaynuypa cayarga cawashun  
lapan shongonchipa Diosman  
yupachicuyälar, nä juchanchipita Dios  
perdonarayämashaga, jinaman Dios  
munangannuy cawanapag Santu  
Espíritu raquirayämashaga. <sup>23</sup>Chauraga  
chaynuypa willapacuyäshun chay  
yupachicuyar shuyacuyanganchita,  
nätan Diosga ningannuy lam imatas  
ruran. <sup>24</sup>Chaura jucninchi jucninchi  
piñapänacuchwan cuyanacur  
cawananchipagmi chaynuypa ali  
cawananchipag. <sup>25</sup>Nä Diosninchi yapay  
cutimugpag cayaptinga mana  
gongaylapa gotucayäshun. Ama chay  
waquincunayga gongashunchu chay  
gotucayta, antis jucninchi jucninchi  
valorchänacuyäshun chaynuypa  
Jesusman yupachicuyänanchipag.

<sup>26</sup>Chaura Diospa willapanta nä  
musyayar juchäcuyälar cawayasha  
manam Cristoga yapay wanungachu

juchanchipita perdonasha cananchipag.  
<sup>27</sup>Chaynuy juchäcuyälar cawayasha  
 Diosmi alisca juyunaypa  
 cunchuchimäshun nina wayichru,  
 Diosta mana cäsucugcunatanuysi.  
<sup>28</sup>Musyanganchinuysi unay wichanga  
 caynuymi cara: Quima runa “Cay  
 runaga Moisés mandanganta manam  
 cäsucunchu” niräriptinga, chay mana  
 cäsucug runata mana cuyapäarmi  
 wanuchipäcug. <sup>29</sup>Cananga masran  
 Diosga cunchuchingas Diospa-mayin  
 Jesusta manacagpag ricagcunataga,  
 jinaman cuyapälar yanapämagninchi  
 Santu Espirituta manacagpag  
 ricagcunataga. Chaura Jesús yawarninta  
 jichrar wanunganpam mushog  
 rimanacuysi cayan, jinaman mana  
 juchaynagpag ricashas cayanchi.  
 Chaycunata manacagpag ricagsi  
 cunchuchisham canga. <sup>30</sup>Chaymi  
 isquirbishachrüsí Diosga cay niyan:  
 “Nogam chay runacunawanga  
 ricanacushag. Chaura imatas  
 rurapäcungannuymi nogaga  
 cutichishag”. Nätan juclä  
 isquirbishachrüsí “Munayniyog Diosmi  
 runancunapa juchanta taripanga”  
 niyanmi. <sup>31</sup>Chaynuy cayaptinga aliscam  
 manchacuchwan imaycamas cawag Dios  
 cunchuchimänanchitaga  
<sup>32</sup>Chaura yarpachracurcay Jesuspa  
 willapan mayacurcangay wichanta.  
 Gamcunaga alisca cunchurcayarsi  
 chaynuylam Diosman yupachicurcaray.  
<sup>33</sup>Gamcunataga runa ricaymi  
 turyaparcur asipapäcushuray  
 manacagpag ricapäcushurniqui.  
 Chaynuy carcayarsi waquin  
 cunchug-mayiquicunata  
 yanapapäcuraymi. <sup>34</sup>Chaynuytan alisca  
 cuyapar carcelchru cagcunatas  
 yanapapäcuray, jinaman imaycunata  
 guechrurcur apacurcaptinsi  
 cushicurcaray “Jana pachachrümi

noganchipagga imanchis ayganchis  
 mana ushacag cayan” nir.

<sup>35</sup>Chauragar chaynuyla  
 yupachicurcayay Diosninchiman. Payga  
 aliscam yanapapäcushunqui  
 ima-aygachrüsí. <sup>36</sup>Gamcuna chaynuyla  
 yupachicurcayaptiquiga Diosga  
 yanapapäcushunqui pay munangannuy  
 cawaytam. Chaura Diosga  
 ningannuylam yanapapäcushunqui.  
<sup>37</sup>Chaymi isquirbishachrüsí salvacupita  
 cay niyan:

“Nämi aywamugpag cayan. Mana  
 alä unaytam chrämunga.

<sup>38</sup>Acrashäga nogaman yupachicuyar  
 alita rurayarmi cawanga.

Nätan yupachicayämanganpita  
 guepaman cutigpagga  
 piñasham cashag” niyanmi.

<sup>39</sup>Noganchiga manam chay guepaman  
 cutigcuna castachu canchi, artis  
 noganchiga Dioslamanmi  
 yupachicuyanchi. Chaymi nä salvashas  
 cayanchi. Nätan chay guepaman  
 cutigcunataga Diosga cunchuchingam.

**11** <sup>1</sup>Diosman yupachicurga “Payga  
 razonpam gomanga” nirmi  
 shuyaranchi mana canan ricapuyarsi.  
<sup>2</sup>Unay awillunchicunaga Diosman  
 yupachicurcanganpam Diospita alipag  
 ricasha capäcura.

<sup>3</sup>Diosman yupachicurmi noganchis  
 musyayanchi, pay rimariptilan cay  
 pacha ruracanganta. Payga cay  
 ricapuyanganchicunata rurara mana  
 imas caygpitam.

<sup>4</sup>Abelga Diosman yupachicug carmi  
 ofrendata gorura wauguen Cainpitaga  
 mas alinninta. Chaymi Diosga ricarura  
 ali ruragpag, nätan Abel chay ali  
 rurangantaga Diosmi  
 musyayächimanchi. Chaura Abelga  
 wanusha cayarsi cawayag yupaymi  
 yarpayächimanchi Dioslaman  
 yupachicunanchipag.

<sup>5</sup>Enoc jutiyog runatas yupachicug canganpita Diosga aywachicura jana pachata cawaglata. Chaymi runacunaga ashircayarsi Enoctaga mana taripäcurachu. Chaypita isquirbishachrüsi “Enocga noga munangänuyumi rurayan” niyanmi. Chaynu y nira manas aywachilarmi. <sup>6</sup>Chaura payman yupachicushaga Diosga aliscam cushicun. Chaura payga yanapämäshunmi.

<sup>7</sup>Diosga “Alisca tamyam canga” niram Noëta. Chay ninganman yupachicurmi payga manaragsi tamyaptilan, manchapacuypa rurara alisca jatun büquita. Chaychrümi lapan castantin salvacarärira, nätan waquin mana yupachicug runacunaga limpum wanurärira, “Cunchuchisha capäcuchun” Dios niruptin. Chaura yupachicunganpam Noëga Diospita “Nä mana juchaynagmi cayanqui” nisha cara.

<sup>8</sup>Diosga Abrahamta “Juc marcata goshay” niram, chay ninganman yupachicurmi, Abrahamga cäsucur aywara mana reguengan marcata.

<sup>9</sup>Abrahamga yupachicug canganpam juc jätucushanuyla yachrara Dios “Goshaymi” ningan marcachru. Payga yachrara garapita rurasha toldunuyisi wayilachrümi. Chaynuytan Isaacsi Jacobsi chaynu y wayilachrümi yachrapäcura “‘Cay marcachru yachrananchipagmi’ Dios nirayämanchi” nir. <sup>10</sup>Chaychru yachrayarmi Abrahamga shuyarara “Dios quiquin rurangan marcachrümi yachrashag” niyar.

<sup>11</sup>Diosman yupachicug canganpam Abrahampaga nä auquin cayaptilan churin cara, warmin Sara machörä cayaptilansi. Chaynu y chawän cayarsi gueshyacurura Dios “Wamray cangam” ninganman yupachicug carmi.

<sup>12</sup>Chaynu y yupachicug canganpam Abraham nä wanunayaptilansi “Castaycuna miranga goyllarcuna chicam, jinaman gochra manyanchru agoysyacuna chicam” nira Diosga.

<sup>13</sup>Abrahamsi Isaacsi Jacobsi wanupäcungancamam Dios ninganman chaynuyla yupachicurcara. Paycunaga carulapita rircaragnuyumi capäcura, Dios “Goshaymi” ningan marcamanga manam chrapäcurachu. Paycunaga Diosman yupachicurmi cay pachachru jätucushanuyla cayarsi cushisha capäcura. <sup>14</sup>Paycunaga chaynu y capäcura jana pachachru cawapäcunanta musyarmi. <sup>15</sup>Paycunaga chay yargapäcamungan marcaman cutiyta munarga cuticurcanmanchri cara. Nätan manam cutipäcurachüga.

<sup>16</sup>Antis paycunaga jana pacha aywaytam imanuypanuyisi munapäcura, chaychru imaycamas cawacurcänanpag. Chaymi Diosga mana pengacurachu “Diosninmi cayä” niyta, nä paycuna yachrapäcunapag jana pachachru camarisha car.

<sup>17</sup>Diosman yupachicug carmi Abrahamga “Japalan churiquita nogapag wanuchiy” Dios niptin, “Äri” nir, cäsucur nä wanuchinanpag cayara.

<sup>18</sup>Nätan “Churiqui Isaacpita castaycuna alisca miranga”, nä nisham cara Diosga. <sup>19</sup>Nätan Abrahamga nämi musyara wanushacunata Dios cawacächimug canganta. Chaura Isaac cara Abrahampaga juc wanushapita cawacächimushanuyumi.

<sup>20</sup>Nätan Diosman yupachicug carmi Isaacsi churin Jacobtawan Esaüta “Mas guepanmanga Diosmi alisca yanapäshunqui” nir, paycunapa janan Diosta manacura.

<sup>21</sup>Diosman yupachicug carmi Jacobsi nä wanucunapag cayar, Josëpa churincunata jucpacama “Diosmi

yanapashunqui” nir, paycunapa janan manacura. Jinarcurmi garrotinman tuncacuyur Diosta alawara.

<sup>22</sup>Diosman yupachicug carmi Josësi, nä wanucunanpag cayar “Egipto nacionpita yargapacunquim, tullücunatas caypita aywarga apacurcanquim” nira chay castancunata.

<sup>23</sup>Diosman yupachicug carmi Moisesna taytansi mamansi Moisés näciruptin pacarärira quima quilla. Chaynuy pacapäcura cuyacuylapag fisyusapa captinmi “Lapan olgo näcimugtam wanuchipäcunqui” rey nirayaptinsi, paycunaga manam cäsucurcarachu.

<sup>24</sup>Moisessi Diosman yupachicug carmi nä jatunyarurga chay cachignin warmita “Nogaga manam wawaychu nä” nirura. <sup>25</sup>Moisesga chaynuy nira “Israel castacunata yanapayaptiga, jina cunchuchipäcamächun” nirmi. Chaura cachigninpa maquinchru juchala rurayta munarga manam chaynuy ninmanchu cara. <sup>26</sup>Moisesga reypa maquinchru alisca ali cawanan trucaga Diospa acrashanpa janan cunchuytam munara. Chaynuy munara “Diosga ima-aygachrüsi yanapämangam” nirmi. <sup>27</sup>Moisesga Diosman yupachicug carmi Egipto nacionpitas yargocura. Nätan manam rey piñäcunatas mancharachu, antis Diosman yupachicuyarmi cawara Diosta mana ricapuyarsi. <sup>28</sup>Chaynuy yupachicurmi Pascua fiestata rurar yawarwan lushira Israel runacunapa wayinpa puncuncunata, mana wamag wamrancunata ángel wanuchinanpag.

<sup>29</sup>Diosman yupachicurmi Israel casta runacuna jatun puca gochra chraupinpa pasapäcura juc chaqui pampapa yupaysi. Nätan Egipto runacunaga gatirarcayanganchru limpu shengaypam wanupäcusha.

<sup>30</sup>Diosman yupachicurganganpam Israel casta runacuna sogta junag Jericó marcata muyurärira. Jinarcurmi ganchris junagchrüga chay marcata muyug tapyä limpu loglarura.

<sup>31</sup>Diosman yupachicunganpam olgon olgon cawag Rahab warmis mana wanurachu, chay waquin mana cäsucugcunawan parëju. Chaymi payga chay ishca runa cachrapäcungantas alipa chrasquir gorpachara.

<sup>32</sup>Maymaychri cayan willapänäpag Gedeonpita, Baracpita, Sansonpita, Jeftëpita, Davidpita, Samuelpita, jinaman Diospa unay willacugnincunapita. <sup>33</sup>Paycunaga Diosman yupachicurmi caycunata rurapäcura; guërrachru nacioncunata yalipäcura, lutan ruragcunatas alilata rurashun nipäcura. Nätan Dios “Yanapashaymi” ningannuyta yanapasha capäcura, manam leoncunas micapäcugchu. <sup>34</sup>Alisca nina rupayagtas upichipäcuram. Espädawan runacuna wanuchiya munarcayaptinsi gueshipäcuram. Mana calpancuna cayaptinsi Diosmi calpanchara. Chaymi guërrachrüsi alisca manchay capäcura, jinaman juclä nacionpita soldäducuna wanuchinanpag aymugcunatas limpum gaticachrapäcura.

<sup>35</sup>Chaynuytan warmicunapa aylluncuna wanuräriptinsi Diosman yupachicurcaptin cawacarärimura. Nätan waquina wanuchipäcunanpita jorgorcayaptinsi “Jina wanuchimächun. Nogaga cawacämushagmi Dioswan cawacunäpag” nipäcuram. <sup>36</sup>Nätan waquintaga astircur astircurmi turyapapäcura, jinaman cadenarcurmi carcelman aywachipäcura.

<sup>37</sup>Waquintaga wanuchipäcura rumiwan chapiypam, nätan waquintam serruchuan chraupipita cuchupäcura Diosman mana yupachicurcänapag.



Nātan wanuchipācuram espādawansi, waquincunaga gaticachrasham wacman cayman chrar puripācura. Paycunaga uyshapa, cabrapa garanpitam jacunta rurapācug. Manam paycunapaga imansi pasay carachu. Laquishalam capācug runacunapitas lutanpag ricasha.

<sup>38</sup>Paycunaga ali runa carcayarsi chay lutan runacunawanmi capācura. Nātan waquina yachrapācug jircacunachrūmi, chunyang pampacunachrūmi, machrayacunachrūmi, jinaman uchrecunachrūmi.

<sup>39</sup>Nātan chaynuy cunchurcayarsi Dios “Goshaymi” ningantaga manam paycunaga chrasquipācurachu. Chaynuy cawayarsi Diospitaga alipag ricasham capācura Dioslaman yupachircanganpita. <sup>40</sup>Paycunaga mana chrasquipācurachu noganchicunawan parēju mas guepamanrag alinninpag ricasha cananchi captinmi.

#### Jesusman chaynuyla yupachircayay

**12** <sup>1</sup>Chaura nā chaychica runacuna Dioslaman yupachircanganta musyayarga, noganchis chay imacunas jarcayāmagninchicunata jitarishun Diosman yupachicuyta mana yanapayāmashaga, jinaman ama juchācushunchu, antis Dioslaman yupachicuyāshun imay imaycamas. <sup>2</sup>Jesús cawangannuy cawashun, payga Dioslamanmi yupachicura alisca cunchuyarsi. Chaymi Jesusga mana pengacurachu cruzchru wanuytas, antis payga musyaram chay cunchuycuna pasaruptin alisca cushisha cananta. Chaymi cananga tayayan Diospa derēchanchru mandayar.

<sup>3</sup>Chauraga Jesuspita yachracurcay. Payga chay juchasapa runacuna ima-aygata cunchurcayāchiptinsi

awantaram. Paynuy awantarga cunchuyarsi manam guepaman cutipācunquichu. <sup>4</sup>Chaura gamcunaga cunchurcayarsi manam Jesús cruzchru wanungannuyga wanupācunquiragchu. <sup>5</sup>Yarpachracurcay Dios castanpag ricapācushurniqui valorchacurcānaypag cay nipācushungayta:

“Churilācuna alila ruragman muyurcayāchiptiga  
ama ‘¿Imanirtag Munayniyog Dios caynuy cunchuyāchimanchi?’  
nipācuychu  
ni amatag piñapapācuptisi  
sinticurcaychu.

<sup>6</sup> Munayniyog Diosninchiga  
chaynuymi ruran pitas  
cuyangancagtaga,  
nātan castanpag ricarga astinmi  
lutanta ruraptinsi”  
nipācushungayta.

<sup>7</sup>Ali tayta carga pisi churinta astinmi lutanta ruraptin. Chaura Dios churinpag rizar ali ruragman muyurcayāchishuptiquiga ima-aygata cunchuyarsi awantapācuy. <sup>8</sup>Tayta Diosga churinpag ricapācushurniquim astiypa alita ruragman muyurcayāchishunqui. Mana churin capācuptiquiga, manam chaynuy rurapācushunquimancho. <sup>9</sup>Cay pachachru taytanchiga mamanchiga lutanta rurasha astimanchim. Chaymi alipa ricanacur cawananchi. Chaura masran Tayta Diosninchitaga manchapācuypa cāsucuchwansi paywan imaycamas cawanapag ali ruragman muyuyāchimashaga.

<sup>10</sup>Cay pachachru taytanchicunaga mamanchicunaga mana alā unay cawananchi cayaptinsi astimanchim ali cawananchipag. Chaynuymi Tayta Diossi astimanchi paynuy mana juchācular cawananchipag.

<sup>11</sup>Astiramasha chayūralaga manam cushicunchichu, antis laquirayanchim.

Chaypita shumag tantiachräcurmi ichaga “Alipagchri astimara alita runanäpag” nir cushicunchi. <sup>12</sup>Chauraga ishquicarcayagcuna valorchacurcay. <sup>13</sup>Jinaman ama juchäcurcaychu, chay waquin ishquishacuna Diosman yupachicircänanpag.

<sup>14</sup>Chaura ali cawapäcuy lapan runawansi, nätan ama juchäcurcaychu. Nätan juchälachru cawagga manam pisi Munayniyog Dioswan cawangachu.

<sup>15</sup>Chaura imanaypanuysi ali cawapäcuy, waquincunas Dios cuyapälar yanaparcayäshungayta tantiapäcunanpag. Nätan gamcuna amam maygaysi alisca piñashalaga capäcunquichu pipagsi. Chaynu y carga quiquiquis lutantam ruracuyanqui, jinaman runacunapagsi cayanqui juc venënuymi. <sup>16</sup>Ama imatas lutancunata gurapäcuychu, ni lutanpagsi ricapäcuychu Dios alipag ricangantaga. Chaura ama Esaünüyga capäcuychu. Payga juc mati micuylawanmi trucasha ima-aygancunatas, wamag wamran canganpita taytan gongancunata. <sup>17</sup>Chaynu y jinacurcarga taytantam “Diosta manacuy ima-aygachrüsi yanapämānanpag” nira. Nätan taytanga manam pasay munarachu alisca wagaräcur manacuyaptinsi.

<sup>18</sup>Gamcuna manam unay Israel castanchicunanuyga aywapäcuraychu Sinai jircata nina chraupipita Dios manchacuy pag rimanganta mayapäcunaypag. Chaychrüga aliscam yanauyaras pucutaras, jinaman tamyaras. <sup>19</sup>Chaychrüga trompëta wagarignuy alisca Dios rimamuptin manam awantapäcurachu, jinaman Dios manchacuy pag rimaptin Israel castanchicunaga “Amanar mastaga rimapapäcamaychu” nipäcuram.

<sup>20</sup>Chaychru Diosga cay niram: “Pitas

maytas, jinaman ima-ayga sima uywacunatas cay jircaman chrämugtaga rumi gompaypa wanuchipäcuy”. Chaynu y rimagta mayarmi mana awantapäcurachu. <sup>21</sup>Chaychrüga alisca manchacuy pagmi cara. Chaymi quiquin Moissesi “Manchacaypitam chuchucuyayä” nira.

<sup>22</sup>Nätan gamcunaga aywarcayanqui Sión jircatam. Chayta aywarga Dios cayanjan jana pacha Jerusalentam aywarcayanqui. Chaychrüga carcayan alisca chranin angelcunam mana yupaysi atipäna. <sup>23</sup>Gamcunaga aywarcayanqui chay naupa cawacämugcuna carcayanganmanmi. Chaychrüga carcayan jana pachachru jutincuna apuntangancunalam. Chaychrümi cayan lapan runapa juchancuna taripag Diosninchis. Paytaga muyurarcayan alita rurag wanusha runacunapa almancunam. <sup>24</sup>Chaychrümi cayan mushog rimanacuy pag yawarninta jichrag Jesusninchis. Chay yawarnin jichranganga mas alinninmi cayan, yawarninta jichrar Abel wanunganpitaga.

<sup>25</sup>Chaura Dios chaynu y rimapayämashaga ama manacag pag ricashunchu. Unay wichan Diosga cay pachachru runacunata rimaparam. Nätan mana cäsucugcunata guncuchiram. Chaynuymi noganchitas Diosga jana pachapita rimapayämānchi. Chaura mana cäsucushaga aliscam cunchuchimäshun. <sup>26</sup>Chay Sinai jircachru Dios rimamuptin cay pachas cuyuram. Nätan cananga “Cay pachatas jana pachatas limpum cuyuchishag” niyämānchim Diosga. <sup>27</sup>Chay junagga Dios munangannuy mana cawagcunaga manam Dioswan capäcungachu. Nätan pay munangannuy cawagcunaga Dioswanmi imaycamas capäcunga.

<sup>28</sup>Chaura Diospa munayninchru nä cawashaga manam pis raquimäshunchu. Chaynuuy captinga Dioslata alawäshun lapan shongonchipa. “Gracias” nicuyar, manchapacuyta servinatam Diosga munan. <sup>29</sup>Razonpam Diosninchiga mana cäsucugcunataga juc ninawan rupachignuymi alisca cunchuchinga.

**13** <sup>1</sup>Chauragar chaynuyla cuyanacurcayay jucniquis jucniquis Diospa castan nä carcayaga.

<sup>2</sup>Nätan chaynuyla gorpacharcayay Diosman yupachicug-mayiquicunata. Chaynuuy gorpacharmi unay wichan Diospa angelnincunata gorpachapäcusha mana pita gorpacharcayangantas musyayar. <sup>3</sup>Gamcunaga mana gongaylapa yanaparcayay carcelchru carcayag Diosman yupachicug-mayiquicunatas, quiquiquicuna carcelchru carcayangaymannuy tincuyächir.

<sup>4</sup>Ama olgon olgonsi ni warmi warminsi cawapäcuychu. Chaynuuy cawagtaga Diosmi cunchuchinga. Chaura warmiyogcuna gowayogcuna ama jucwan jucwanga capäcuychu, antis gowalaycunawan warmilaycunawan cacurcay. <sup>5</sup>Nätan ama imanaypanuysi golguetaga ashircayaychu antis capurcäshungalaywan cushisha capäcuy. Diosga cay niyämanchim:

“Nogaga manam imaysi gongapäcushaychu ni jinalataga cachipäcushaypishchu”.

<sup>6</sup>Chauraga caynuymi nichwan: “Munayniyog Diosmi nogataga yanapäman, ima-aygata runacuna ruramaptinsi manam manchächu” nichwan.

<sup>7</sup>Nätan ama gongapäcuychu Diospita chay yachrachipäcushungayta. Paycuna Diospa willapanman imanuy

yupachicurcayarmi cawapäcura. Chaynuuy gamcunas Diosman yupachicuyar cawapäcuy. <sup>8</sup>Jesucristopa willapanga pachalanmi cayan unaypita canancamas. Nätan chaynuylam cayanga imay imaycamas.

<sup>9</sup>Chauraga ama chrasquipäcuychu Jesús yachrachinganpita jucnuyta yachrachipäcushuptiquiga. Dios cuyapälar yanapämaptinchim aliga cayanchi, manam runacuna “Wacta cayta micurmi aliga canqui” nigta cäsucurchu.

<sup>10</sup>Chaura Jesuslam juchanchicunapitaga wanusha juc altarchru uywa wanuchishanuysi. Chaytaga Diospa wayinchru chay imatas ruragcuna manam micuyta atipapäcunchu. <sup>11</sup>Sacerdötícunapa mas mandagnincagga uywacunapa yawarnintam wichig Dios cacunancagchru runacuna juchancunapita perdonasha capäcunanpag. Nätan chay uywacunapa aychancunataga marcapita washatam jorgapäcamug rupachipäcunanpag.

<sup>12</sup>Chaynuymi Jesustas marcapita washata jorgarcamur cruzchru wanuchipäcura. Chaychrümi yawarninta jichrar wanura runacuna juchanpita perdonasha capäcunanpag.

<sup>13</sup>Chaura chay jucnuuy yachrachiytaga ama cäsucurcaychu, chay marcapita washapa yargognuysi, antis Jesusta cäsucurcangaypitaga jina chregnipapäcushunqui paytanuysi. <sup>14</sup>Cay pachachruga gorpachashanuylam cayanchi. Jana pachachrümi noganchipa marcanchiga cayan Dioswan cacunanchipag.

<sup>15</sup>Chauraga chaynuyla alawayäshun Diosta Jesús chaynuuy ruranganpita. Nätan chaynuyla niyäshun “Jesusmi Munayniyogniga” nir. <sup>16</sup>Chaynuyla alicunataga rurarcayay, jinaman

Jesusman yupachicug-mayiquicunata yanapapäcuy imas capurcäshungaywan. Chaynuy cawapäcuptiquiga juc alinnin ofrendanuyimi Diospagga cayan.

<sup>17</sup>Jinaman cäsucurcay Jesusman yupachicug gotucagcunachru mandagcunata. Paycunam gamcunataga yanaparcayäshunqui ali cawapäcunaypag. Nätan Diosga paycunatas juc junagga “¿Imanuyimi runäcunata yanaparay?” ningam. Chaura paycuna “Wacta u cayta rurashun” nipäcushuptiqui cäsucurcay, cushisha yanapapäcushunaypag. Nätan mana cäsucurga lutantam rurarcayanqui.

<sup>18</sup>Nogacunapag Diosta manacurcayay alita rurapäcunäpag, ima-ayga ruray munarcayanganchrüsi alitam rurayta munarcayä. <sup>19</sup>Chauragar alisca alisca Diosta manacurcay gamcunaman cananpita mana alä unayta cutimunäpag.

<sup>20</sup>Chauraga Munayniyog Jesucristota wanushapita cawacächimug Dios Taytanchi alita cawachipäcushunqui. Paymi alinnincag michimagninchi

cayan. Pay yawarninta jichrar wanunganpam Diossi yapay rimanacura runacunawan. <sup>21</sup>Chaura Jesús wanunganpam Dios Taytanchiga ima-aygachrüsi yanapapäcushunqui. Pay munanganta rurachun gamcunawan, nätan gamcunas pay munangannuy cawapäcuy. Chaura Jesucristo alipa ricasha cachun imaypita imaycamas. Chaynuy cachun.

<sup>22</sup>Diosman yupachicug-mayicuna, nogaga piñaparcayag cay juc ishca y isquirbiyämungächru ali cawapäcunaypagmi. Chaura alipa chrasquicurcay.

<sup>23</sup>Nämi Diosman yupachicug-mayinchi Timoteosi carcelpita yargaramun, manas aywamungäcamala chraramuptinga paywansi aywapäcamushagmi. <sup>24</sup>Saludayäri lapan mandagniquicunata jinaman Diosman lapan yupachicugcunata. Nätan Italiachru Jesusman yupachicugcunas salüdutam aparcayächimushunqui. <sup>25</sup>Chaura Diosninchi cuyapälar ima-aygachrüsi yanapapäshunqui. Chaynuy cachun.